

**Broj: 07-02-422-31/07**  
**Mostar, 27.12.2007. godine**

Na osnovu člana 14, člana 15. i člana 50. Zakona o električnoj energiji („Službene novine FBiH“ broj 41/02, 24/05, 38/05), člana 12. stav (1) i člana 14. stav (1) Statuta Regulatorne komisije za električnu energiju u Federaciji Bosne i Hercegovine („Službene novine FBiH“ broj 13/04), člana 31. stav (2) i člana 37. stav (3) i člana 58. Poslovnika o radu FERK-a („Službene novine FBiH“ broj 59/04) i članova 40-49, člana 51, člana 56, člana 59. i člana 71. Pravilnika za tarifnu metodologiju i tarifne postupke („Službene novine FBiH“ broj 45/05), te Odluka Državne regulatorne komisije za električnu energiju - DERK broj 04-28-395-39/07, broj 04-28-396-35/07 i broj 04-28-395-40/07 od 19.12.2007. godine, i Rješenja Regulatorne komisije za električnu energiju u Federaciji Bosne i Hercegovine broj 07-02-273-43/3/07 od 14.12.2007. godine, broj 07-02-274-38/4/07 od 14.12.2007. godine i broj 07-02-275-38/5/07 od 14.12.2007. godine, Regulatorna komisija za električnu energiju u Federaciji Bosne i Hercegovine – FERK je 27.12.2007. godine na XVIII. redovnoj sjednici donijela

**O D L U K U**  
**o tarifnim stavovima za prodaju električne energije**  
**nekvalifikovanim (tarifnim) kupcima Javnog preduzeća Elektroprivreda Bosne i**  
**Hercegovine d.d. - Sarajevo**

**Član 1.**

Ovom Odlukom utvrđuju se tarifni stavovi za prodaju električne energije za nekvalifikovane (tarifne) kupce **Javnog preduzeća Elektroprivreda Bosne i Hercegovine d.d. - Sarajevo**.

**Član 2.**

Tarifni stavovi za nekvalifikovane (tarifne) kupce po kategorijama i grupama potrošnje određeni su u zavisnosti od troškova proizvodnje, nabavke, distribucije i snabdijevanja električnom energijom, te troškova prenosa, rada NOS-a, uključujući i troškove sistemskih usluga (po Odlukama DERK-a broj 04-28-395-39/07, broj 04-28-396-35/07 i broj 04-28-395-40/07 od 19.12.2007. godine), koje te kategorije i grupe potrošnje stvaraju svojim načinom i vremenom korištenja električne energije, uvažavajući načelo postepenosti promjena.

Tarifni stavovi za prodaju električne energije za nekvalifikovane (tarifne) kupce Javnog preduzeća Elektroprivreda Bosne i Hercegovine d.d. – Sarajevo s primjenom od 01.01.2008. godine su:

TARIFNI STAVOVI ZA NEKVALIFIKOVANE (TARIFNE) KUPCE

TARIFNI ELEMENTI	JED. MJERE	SEZONSKI	DNEVNI	Visoki napon		Srednji napon		Niski napon			
				110 kV	35 kV	10 kV	DOMAĆINSTVA		OSTALA POTROŠNJA		JAVNA RASVJETA
							I tar. grupa	II tar. grupa	I tar. grupa	II tar. grupa	
0	1	2	3	4	5	6	7	8	9	10	11
MJERNO MJESTO KUPCA	KM	-	-	20,00	20,00	17,50	3,95	3,95	11,00	6,90	3,70
OBRAČUNSKA SNAGA	KM/kW/mjesec	VIŠI	-	13,79	18,43	22,68	0,00	0,00	15,31	0,00	0,00
		NIŽI	-	10,61	14,18	17,45	0,00	0,00	11,78	0,00	0,00
AKTIVNA ENERGIJA	pf/kWh	VIŠI	VEĆI	9,49	10,11	11,45	12,52	15,65	15,52	25,93	17,33
			MANJI	4,74	5,06	5,72	0,00	7,83	7,76	12,97	0,00
		NIŽI	VEĆI	7,30	7,78	8,81	9,63	12,04	11,93	19,95	13,33
			MANJI	3,65	3,89	4,40	0,00	6,02	5,97	9,97	0,00
PREKOMJER PREUZETA REAKTIVNA ENERGIJA	pf/kvarh	-	-	0,951	2,14	2,68	0,00	0,00	3,22	0,00	0,00

### Član 3.

U tarifnim stavovima iz člana 2. ove Odluke nije ukalkulisan iznos poreza na dodatnu vrijednost, za koji Javno preduzeće Elektroprivreda Bosne i Hercegovine d.d. - Sarajevo ima obavezu posebno ga evidentirati na svakom pojedinačnom računu kupca.

### Član 4.

Viša (zimski) sezona traje od 01.01. do 31. 03. i od 01.10. do 31.12.

Niža (ljetna) sezona traje od 01.04. do 30.09.

Veći dnevni tarifni stavovi primjenjuju se od 7:00 do 13:00 sati i od 16:00 do 22:00 sata, tokom zimskog računanja vremena.

Manji dnevni tarifni stavovi se primjenjuju od 0:00 do 7:00 sati, od 13:00 do 16:00 sati i od 22:00 do 24:00 sata, tokom zimskog računanja vremena, te nedjeljom.

Veći dnevni tarifni stavovi se primjenjuju od 8:00 do 14:00 sati i od 17:00 do 23:00 sata, tokom ljetnog računanja vremena

Manji dnevni tarifni stavovi se primjenjuju od 0.00 do 8:00 sati, od 14:00 do 17:00 sati i od 23:00 do 24:00 sata, tokom ljetnog računanja vremena, te nedjeljom.

Odnos između više i niže sezone je 1,3:1, po tarifnim elementima aktivna električna energija i obračunska snaga, dok je odnos većih i manjih dnevnih tarifnih stavova 2:1 po tarifnom elementu aktivna električna energija.

### Član 5.

Kategorije potrošnje su sljedeće:

- kupci koji električnu energiju preuzimaju na 110 kV naponu
- kupci koji električnu energiju preuzimaju na 35 kV naponu
- kupci koji električnu energiju preuzimaju na 10(20) kV naponu
- domaćinstva-kupci koji električnu energiju preuzimaju na 0,4 kV naponu
- ostala potrošnja-kupci koji električnu energiju preuzimaju na 0,4 kV naponu i
- javna rasvjeta-kupci koja električnu energiju preuzimaju na 0,4 kV naponu.

### Član 6.

Kupcima koji električnu energiju preuzimaju na 110 kV naponu, 35 kV naponu i 10 (20) kV naponu, obračunava se izmjerena aktivna električna energija, vršna snaga izmjerena u vrijeme primjene većih dnevnih tarifnih stavova (obračunska snaga), prekomjerno preuzeta reaktivna električna energija i mjesečna naknada po mjernom mjestu kupca.

### Član 7.

Grupe unutar kategorije potrošnje domaćinstva su:

- I tarifna grupa, kupci koji posjeduju jednotarifno ili dvotarifno brojilo bez uklopnog sata ili nekog drugog uređaja za upravljanje tarifom,
- II tarifna grupa, kupci koji posjeduju dvotarifno brojilo sa uklopnim satom ili nekim drugim uređajem za upravljanje tarifom.

Kupcima iz I i II tarifne grupe iz ovog člana obračunava se izmjerena aktivna električna energija i mjesečna naknada po mjernom mjestu kupca.

### Član 8.

Grupe unutar kategorije ostala potrošnja su:

- I tarifna grupa, kupci priključeni na 0,4 kV napon, koji nisu domaćinstva niti javna rasvjeta i kojima se obračunava izmjerena aktivna električna energija, vršna snaga izmjerena u vrijeme primjene većih dnevnih tarifnih stavova (obračunska snaga), prekomjerno preuzeta reaktivna električna energija i mjesečna naknada po mjernom mjestu kupca.

- II tarifna grupa, kupci priključeni na 0,4 kV napon, koji nisu domaćinstva niti javna rasvjeta i kojima se obračunava izmjerena aktivna električna energija i mjesečna naknada po mjernom mjestu kupca.

### Član 9.

Kupcima iz kategorije potrošnje javna rasvjeta obračunava se izmjerena aktivna električna energija i mjesečna naknada po mjernom mjestu kupca.

### Član 10.

Javno preduzeće Elektroprivreda Bosne i Hercegovine d.d. - Sarajevo obavezno je tarifne stavove iz ove Odluke učiniti dostupnim svim nekvalifikovanim (tarifnim) kupcima.

### Član 11.

Ova Odluka stupa na snagu danom donošenja, a početkom njene primjene prestaje se primjenjivati Odluka FERK-a od 24.03.2006. godine o tarifnim stavovima za prodaju električne energije tarifnim (nekvalifikovanim) kupcima Javnog preduzeća Elektroprivreda Bosne i Hercegovine d.d. - Sarajevo („Službene novine FBiH“ broj 15/06).

Ova odluka se objavljuje na oglasnoj tabli FERK-a, web stranici FERK-a, a dispozitiv Odluke i u „Službenim novinama FBiH“.

## O b r a z l o ž e n j e

U skladu sa članom 14. i članom 15. Zakona o električnoj energiji, FERK je pored ostalog mjerodavan za utvrđivanje tarifnih stavova za korisnike distributivnih sistema i tarifnih stavova za nekvalifikovane kupce, kao i za zaštitu prava kupaca, elektroprivrednih društava za distribuciju i proizvođača električne energije, te nadgledanja odnosa u elektroenergetskom sektoru i regulisanje kvalitete usluga na svim nivoima, kao i tarife i naknade koje se plaćaju na monopolske usluge u distribuciji, imajući u vidu interese i potrebe svih korisnika za snabdijevanjem električnom energijom.

Član 49. Pravilnika za tarifnu metodologiju i tarifne postupke propisuje da tarifni stavovi predstavljaju jedinične cijene za tarifne elemente utvrđene tarifnom metodologijom za svaku kategoriju i grupu potrošnje, te da se razlikuju dnevni tarifni stavovi, sezonski tarifni stavovi, tarifni stavovi u zavisnosti od nivoa potrošnje (blok tarifa) i tarifni stavovi u zavisnosti od vremena trajanja vršnog opterećenja, kao i da FERK posebnom odlukom odobrava i proglašava važećim tarifne stavove po završetku tarifnog postupka.

Član 51. stav (1) Pravilnika za tarifnu metodologiju i tarifne postupke propisuje da tarifni kupci računom za električnu energiju plaćaju cijenu koja pokriva sve troškove sistema, koji su nastali kako bi se osiguralo kontinuirano napajanje električnom energijom. Ta cijena uključuje sljedeće troškove:

- a) troškove proizvodnje i/ili nabavke električne energije (utrošak snage, aktivne energije, prekomjerno preuzete reaktivna energije i pomoćnih usluga),
- b) troškove prenosa i NOS-a (troškovi vezani za prenosnu mrežarinu, pomoćne usluge i rad NOS-a),
- c) troškove distribucije (troškovi vezani za distributivnu mrežarinu i mjesečnu naknadu),
- d) troškove snabdijevanja.

Članom 56. ovog Pravilnika pored ostalog je propisano da je diskrecijsko pravo i ovlaštenje FERK-a da razmotri i potvrdi sve troškove i prihode dostavljene kao podrška predloženim tarifama, te da prihvati, odbije ili prilagodi bilo koju stavku koja nije opravdana, razmotri i potvrdi cjelokupna sredstva koja su predložena da budu dijelom osnove regulisanih sredstava i da prihvati, odbije ili prilagodi vrijednost bilo kojeg od tih sredstava, prihvati, odbije ili prilagodi svaku veličinu ili analizu korištenu za proračun predložene tarife, i prihvati predložene tarife ili da ih prilagodi na odgovarajući način.

Članom 71. istog Pravilnika propisano je da će FERK, uvažavajući načelo postepenog uvođenja međunarodno prihvaćene regulatorne prakse i postepenog uvođenja opšteprihvaćenih međunarodnih standarda u tarifnom postupku, voditi računa o izbjegavanju naglih i velikih promjena tarifa u prelaznom periodu, kao i o postupnom ukidanju unakrsnih subvencija između elektroprivrednih djelatnosti, kategorija i grupa potrošnje, kao i o postepenosti pri odobravanju stope povrata na vlasnički kapital, te da postepenost u primjeni tarifne metodologije u prelaznom periodu podrazumijeva i postepenost u eventualnim izmjenama tarifa, koje će na kraju prelaznog perioda u potpunosti biti zasnovane na opravdanim troškovima.

FERK je na osnovu Zahtjeva Javnog preduzeća Elektroprivreda Bosne i Hercegovine d. d. – Sarajevo od 26.03.2007. godine i to Zahtjeva za odobrenje tarifa za djelatnost proizvodnje električne energije primljenim pod brojem 07-02-273/3/07, Zahtjeva za odobrenje tarifa za djelatnost distribucije električne energije primljenim pod brojem 07-02-274/4/07 i Zahtjeva za odobrenje tarifa za djelatnost snabdijevanja električnom energijom primljenim pod brojem 07-02-275/5/07 dana 15.06.2007. godine donio Odluku o provođenju drugog tarifnog postupka broj 07-07-542-01/07. Navedenom odlukom FERK je odredio vrijeme i mjesto održavanja formalnih rasprava u drugom tarifnom postupku i to formalnih rasprava po zahtjevima za odobrenje tarifa za djelatnost proizvodnje, distribucije i snabdijevanja električnom energijom i formalne rasprave o Prijedlogu tarifnih stavova za prodaju električne energije nekvalifikovanim (tarifnim) kupcima, koji prijedlog je Javno preduzeće Elektroprivreda Bosne i Hercegovine d. d. – Sarajevo podnijelo dana 14.05.2007. godine, primljen pod brojem 07-02-422/07, nakon što je isti odobren od strane Nadzornog odbora javnog preduzeća. Status umješaća u formalnoj raspravi o Prijedlogu tarifnih stavova za prodaju električne energije tarifnim kupcima su stekli Udruženje poslodavaca u Federaciji Bosne i Hercegovine Sarajevo Zaključkom broj 07-02-422-08/07, Udruženje potrošača „Klub potrošača TK“ Tuzla Zaključkom broj 07-02-422-09/07, „Mittal Steel Zenica“ d.o.o. Zenica Zaključkom broj 07-02-422-10/07, Udruženje potrošača „Klub potrošača HNK“ Mostar Zaključkom broj 07-02-422-11/07, Savjet potrošača BPK Goražde

Zaključkom broj 07-02-422-12/07 i Ombudsman za zaštitu potrošača u Bosni i Hercegovini Zaključkom broj 07-02-422-13/07, donesenim od strane FERK-a 27.06.2007. godine.

Postupajući po Zahtjevima za odobrenje tarifa Javnog preduzeća Elektroprivreda Bosne i Hercegovine d. d. Sarajevo, FERK je dana 14.12.2007. godine donio Rješenje broj 07-02-273-43/3/07, kojim je Javnom preduzeću Elektroprivreda Bosne i Hercegovine d. d. - Sarajevo za djelatnost proizvodnje električne energije odobren potreban prihod od nekvalifikovanih (tarifnih) kupaca na godišnjem nivou u iznosu od 347.334.100 KM.

Rješenjem broj 07-02-274-38/4/07 FERK je Javnom preduzeću Elektroprivreda Bosne i Hercegovine d.d. -Sarajevo za djelatnost distribucije električne energije odobrio potreban godišnji prihod od tarifa za korisnike distributivnog sistema u iznosu od 104.438.859 KM, prihod za pokrivanje distributivnih gubitaka u iznosu od 30.641.886 KM i prihod za proizvodnju električne energije iz distributivnih hidroelektrana u iznosu od 3.069.289 KM

Rješenjem broj 07-02-275-38/5/07 FERK je Javnom preduzeću Elektroprivreda Bosne i Hercegovine d.d.- Sarajevo za djelatnost snabdijevanja električnom energijom odobrio potreban godišnji prihod od nekvalifikovanih (tarifnih) kupaca u iznosu od 17.862.629 KM i troškove nabavke električne energije od nezavisnih proizvođača u iznosu od 3.500.000 KM.

Na osnovu odobrenih potrebnih prihoda od nekvalifikovanih (tarifnih) kupaca djelatnosti proizvodnje, distribucije i snabdijevanja električnom energijom, kao i prihoda za proizvodnju električne energije iz distributivnih elektrana i troška nabavke električne energije od nezavisnih proizvođača ukupan potreban prihod Javnog preduzeća Elektroprivreda Bosne i Hercegovine d.d. – Sarajevo od nekvalifikovanih (tarifnih) kupaca iznosi 476.204.877 KM.

Tarifni stavovi su utvrđeni alokacijom troškova proizvodnje i nabavke električne energije, troškova distribucije, troškova snabdijevanja električnom energijom, te troškova prenosa električne energije i rada NOS-a, uključujući troškove sistemskih usluga i prekomjerno preuzete reaktivne električne energije po tarifnim elementima za kategorije i grupe potrošnje, uključujući sezonsko i dnevno vremensko diferenciranje.

Tarifni stavovi za nekvalifikovane (tarifne) kupce zasnovani su na sljedećem:

- prosječna proizvodna cijena električne energije iznosi 0,07685 KM/kWh za količinu energije od 4519,9 GWh koja se odnosi na proizvodnju iz vlastitih hidroelektrana i termoelektrana,
- troškovi korištenja distributivne mreže iznose 135.080.745 KM, koje čine troškovi distributivne djelatnosti u visini odobrenog potrebnog prihoda u iznosu od 104.438.859 KM i troškovi gubitaka električne energije u distributivnoj mreži u iznosu od 30.641.886 KM,
- troškovi proizvodnje električne energije iz distributivnih hidroelektrana iznose 3.069.289 KM
- troškovi djelatnosti snabdijevanja električnom energijom iznose 17.862.629 KM,



- troškovi nabavke električne energije od nezavisnih proizvođača iznose 3.500.000 KM,
- dio prenosne mrežarine koji se odnosi na energiju u iznosu od 0,00566 KM/kWh preuzete aktivne električne energije iz mreže prenosa i dio prenosne mrežarine koji se odnosi na snagu u iznosu od 1,454 KM/kW, utvrđene odlukom DERK-a broj 04-28-396-35/07 od 19.12.2007. godine,
- tarifa za rad NOS-a iznosi 0,000399 KM/kWh preuzete aktivne električne energije iz mreže prenosa utvrđene odlukom DERK-a broj 04-28-395-39/07 od 19.12.2007. godine,
- tarifa za sistemske usluge u iznosu od 0,002188 KM/kWh preuzete aktivne električne energije iz mreže prenosa utvrđene odlukom DERK-a broj 04-28-395-40/07 od 19.12.2007. godine,
- tarifa za prekmjerno preuzetu reaktivnu električnu energiju u iznosu od 0,00951 KM/kvarh, utvrđena Odlukom DERK-a broj 04-28-395-40/07 od 19.12.2007. godine i alocirana na kategorije i grupe potrošnje kojima se obračunava prekomjerno preuzeta reaktivna energija.

FERK je u razmatranju Zahtjeva u drugom tarifnom postupku u najvećoj mogućoj mjeri poštivao osnovna načela koja propisuju da će tarife biti pravedne i razumne, ravnopravne i određene na transparentan način, uvažavajući da postepenost u primjeni tarifne metodologije u prelaznom periodu podrazumjeva i postepenost u izmjenama tarifa, koje će tek na kraju prelaznog perioda u potpunosti biti zasnovane na opravdanim troškovima, a sve u skladu sa odredbama Pravilnika za tarifnu metodologiju i tarifne postupke, koje se odnose na prelazni period.

Kako se može vidjeti u Pravilniku za tarifnu metodologiju i tarifne postupke u poglavlju o prelaznom periodu, politika FERK je da se elektroenergetski sektor mora kretati u pravcu tarifa koje pokrivaju opravdane troškove regulisane kompanije. Cilj FERK-a je da regulisane kompanije rade na efikasan i ekonomičan način provodeći aktivnosti koje će prouzrokovati neophodne opravdane troškove i ostvarivati prihod po regulisanim tarifama.

FERK je u svom Pravilniku za tarifnu metodologiju i tarifne postupke zatražio da regulisane kompanije posluju u skladu sa Zakonom o električnoj energiji. U drugom tarifnom postupku po Zahtjevima za odobrenje tarifa podnosioca zahtjeva JP Elektroprivreda BiH d.d. Sarajevo, svi kupci su posmatrani kao nekvalifikovani (tarifni) kupci, u smislu utvrđivanja opravdanosti troškova, uz nastojanje da se subvencioniranje između različitih kategorija potrošnje svede na najmanju moguću mjeru do njegovog konačnog ukidanja na kraju prelaznog perioda. Implementacija standarda nediskriminacije i obaveze javne usluge nametnute su od Parlamenta FBiH u obliku Zakona o električnoj energiji, što znači da sada postoje standardi koje FERK provodi u javnosti što rezultira nediskriminacijom i pravilnom raspodjelom troškova.

Važno je da Javno preduzeće Elektroprivreda Bosne i Hercegovine d. d. – Sarajevo, kao i cijeli sektor i javnost, razumiju kako su standardi koje FERK nameće elektroprivrednom društvu nastali primjenom zakona i sastoje se od ispitivanja i

opravdavanja podataka o troškovima koje je uzrokovala regulisana kompanija. FERK se ponaša u skladu sa zakonom; troškove je uzrokovala regulisana kompanija prilikom svog poslovanja, tako da je ista dužna prikazati i opravdati te troškove u skladu sa članom 23, članom 30. i članom 37. Pravilnika za tarifnu metodologiju i tarifne postupke, a FERK u skladu sa članom 58. Poslovnika o radu FERK-a prilikom odlučivanja o opravdanosti nekog troška uzima u obzir i činjenicu da je informacija o istom data ili uskraćena.

Kada se radi o tarifama, dužnosti nezavisnog regulatora u skladu sa zakonom su verifikacija podataka o troškovima i postepeno uvođenje promjena tarifa s ciljem potkrepljivanja tarifa zasnovanih na troškovima u skladu sa Direktivama EU, Zakona i propisa koje donosi FERK. Regulisane kompanije imaju obavezu pridržavati se propisa za snabdijevanje električnom energijom tarifnih kupaca u skladu sa obavezom vršenja javne usluge.

Sve regulisane kompanije koje imaju obavezu vršenja javne usluge moraju osigurati električnu energiju svim svojim nekvalifikovanim (tarifnim) kupcima što je moguće ekonomičnije. Ova obaveza ima svoje osnove u zakonu, a posebno:

- Dozvole za rad - licence za obavljanje elektroprivrednih djelatnosti dodjeljene Javnom preduzeću Elektroprivreda Bosne i Hercegovine d.d. – Sarajevo, sadrže obavezu vršenja javne usluge za Javno preduzeće Elektroprivreda Bosne i Hercegovine d.d. – Sarajevo opisane u stavovima 4.2.1. i 4.1.1. tako da je imalac licence obavezan da regulisane elektroprivredne djelatnosti obavlja kao javnu uslugu, kako je propisano važećim zakonima, podzakonskim aktima, propisima i pravilima FERK-a i u skladu sa direktivama EU i međunarodnim ugovorima, koje je prihvatila BiH.

- Direktiva 2003/54/EC vezana za Zajednička pravila za unutarnje tržište električne energije, u članu 3. opisuje obavezu javne usluge i dužnost kompanije koja ima obavezu javne usluge da štiti svoje kupce. Posebno, formulacija navodi: “. . . U opštem ekonomskom interesu, države članice mogu preduzetništvima koja djeluju u elektroenergetskom sektoru, nametnuti obavezu javne usluge koja je vezana za sigurnost, uključujući sigurnost snabdijevanja, redovnost, kvalitetu i cijene snabdijevanja i zaštite okoline, uključujući energetske efikasnost i klimatsku zaštitu.”

- Prema članu 4. Pravilnika za tarifnu metodologiju i tarifne postupke, obaveza javne usluge definisana je tako da „označava obavezu elektroenergetskih preduzeća da vrše izvjesne elektroenergetske djelatnosti kao javnu uslugu, prije svega vezano za sigurnost, redovnost, kvalitetu, cijene snabdijevanja i zaštite okoline u skladu sa zakonom i Direktivama EU.”

- Prema članu 5. Pravilnika za tarifnu metodologiju i tarifne postupke, ciljevi metodologije su da za tarifne kupce utvrde tarife koje su razumne i zasnovane na troškovima, zasnovane na uobičajenoj međunarodnoj praksi.



Obaveza javne usluge znači da elektroprivredno društvo mora raditi u opštem ekonomskom interesu tarifnih kupaca, uzrokujući troškove koji su razumni i zasnovani na uobičajenoj međunarodnoj praksi, što podrazumjeva planiranje i isporuku u korist kupaca.

Trošak električne energije za nekvalifikovane (tarifne) kupce u ovom tarifnom postupku većim djelom zasnivao se na procjenjenim podacima podnosioca zahtjeva. Budući da su procjene podložne znatnim varijacijama, u narednom tarifnom postupku, FERK namjerava ispitati mjesečne podatke o stvarnim količinama i cijenama električne energije proizvedene za nekvalifikovane (tarifne) kupce iz vlastitih izvora.

Prilikom donošenja ove odluke FERK je vodio računa o sveobuhvatnom procesu reforme elektroenergetskog sektora u Bosni i Hercegovini, čiji je cilj ekonomski zdrav i održiv razvoj elektroenergetskog sektora, a glavni elementi reforme razdvajanje sadašnjih vertikalno integrisanih monopola na djelatnost proizvodnje, distribucije i snabdijevanja električnom energijom i rebalansiranje tarifa, što sve zajedno nije stvorilo uslove za promjenu dosadašnjeg dizajna tarifnih stavova. Akcionim planom Federacije Bosne i Hercegovine za prestrukturiranje i privatizaciju elektroenergetskog sektora u Bosni i Hercegovini („Službene novine FBiH“ br.31/05 i 39/05) Vlada Federacije Bosne i Hercegovine je dala okvir koji omogućava provođenje reforme, a elektroprivredno društvo je do potpune implementacije usvojene tarifne metodologije, dužno izvršiti obaveze definisane Akcionim planom FBiH.

U skladu sa članom 56. Pravilnika za tarifnu metodologiju i tarifne postupke vlastita je odluka i nadležnost FERK-a da razmotri i potvrdi sve troškove dostavljene kao podrška predloženim tarifama, da prihvati, odbije ili prilagodi svaku veličinu ili analizu korištenu za proračun predložene tarife. Polazeći od navedenog prava i ovlaštenja, FERK je uzeo u obzir principe transparentnosti i ravnopravnosti svih sudionika na tržištu, a prije svega nediskriminaciju prema bilo kom kupcu električne energije, opredjelivši se za postepeno uvođenje međunarodno prihvaćene regulatorne prakse i postepeno uvođenje opšteprihvaćenih međunarodnih standarda u tarifnom postupku, kako bi se izbjegle iznenadne i drastične promjene tarifa u prelaznom periodu, a posebno uzimajući u obzir nepostojanje razvijenih socijalnih mjera, zbog čega je FERK odlučio da izbjegne nagle i velike promjene tarifa u prelaznom periodu, vodeći računa o postepenom ukidanju subvencija između elektroprivrednih djelatnosti, kategorija i grupa potrošnje, kao i o postepenosti pri odobravanju stope povrata na vlasnički kapital.

Na osnovu Rješenja broj 07-02-273-43/3/07, Rješenja broj 07-02-274-38/4/07 i Rješenja broj 07-02-275-38/5/07 i sukladno Odlukama Državne regulatorne komisije za električnu energiju - DERK broj 04-28-395-39/07, broj 04-28-396-35/07 i broj 04-28-395-40/07 od 19.12.2007. godine, a slijedeći ciljeve kojima se FERK rukovodio, čije ostvarenje mu je povjerio Zakon o električnoj energiji, a pravila i propisi FERK-a, kao provedbeni akti navedenog Zakona potvrdili, odnosno vodeći se time da tarife trebaju biti razumne, ravnopravne i određene na transparentan način, kao i uvažavajući postepenost u eventualnim izmjenama tarifa, koje će tek na kraju prelaznog perioda u potpunosti biti

zasnovane na opravdanim troškovima, te imajući u vidu sve specifične okolnosti koje postoje u elektroenergetskom sektoru i Federaciji Bosne i Hercegovine uopšte, kao i to da je provođenje politike FERK-a u neposrednom odnosu s provođenjem aktivnosti iz usvojenog Akcionog plana Federacije Bosne i Hercegovine za prestrukturiranje i privatizaciju elektroenergetskog sektora u Bosni i Hercegovini, FERK je odlučio kao u dispozitivu.

**PREDSJEDNIK FERK-a**  
**Risto Mandrapa s.r.**